

Script of Morning Gojri News Bulletin 28 November 2024 at 1015Hrs

مارننگ گو جری نیوز بلیٹن مورخہ 28 نومبر 2024

یوہ آکا شوانی جموں ہے عبید الرحمن تیں خبر سنو۔

Vaishnav Socail Media OTT

مرکزی وزیر برائے اطلاعات و نشریات اشونی ویشنو نے سوشل میڈیا تے دیگر اوٹی ٹی پلیٹ فارم واسطے سخت قوانین غی مانگ کی ہے۔ لوک سبھا مانہ اک سوال غا جواب مانہ موصوف نے کہیو کہ موجودہ قوانین نانہ مزید سخت کرن غی ضرورت ہے تانجے سوشل میڈیا ور موجودہ فحاش مواد ور نظر رکھی جا سکے۔ انہاں نے کہیو کہ آج غا دور مانہ سوشل میڈیا اظہار رائے غو بہترین ذریعو ہے لیکن ان پلیٹ فارم ور فحاش مواد وی دسیو جائے۔ ان نے کہیو کہ مہارا ملک غی ثقافت مانہ تے ان ملکاں غی ثقافت مانہ بڑو فرق ہے، جتوں یہ سوشل میڈیا پلیٹ فارم تیار کیا گیا ہیں۔ وزیر موصوف نے مزید کہیو کہ متعلقہ پارلیمانی کمیٹی نانہ اس معاملہ ور سنجیدگی نال غور کرنو چاہیے اور اس ضمن مانہ سخت قوانین بنایا جانا چاہیے۔

NSG

مرکزی وزارت داخلہ نے جموں شہر غے اندر کسے وی بڑا دہشت گرد حملہ نال نمڑن واسطے قومی مستقل حفاظتی گارڈز یعنی این ایس جی تعینات کر دتا ہیں۔ مہارا جموں غا نمائندہ نے خبر دتی ہے کہ این ایس جی غو اک شعبو مستقل طور ور جموں شہر غے اندر تعینات ہے۔ اور کسے وی دہشت گردانہ حرکت ور منٹاں غے اندر کا روائی کرن غی صلاحیت رکھے۔ اس این ایس جی عملہ غی تشکیل جموں غا کئی ضلعان غے اندر دہشت گردانہ حملان تیں بعد کی گئی ہے۔ تانجے اس طرح غا کسے وی معاملہ نال فوری طور نمڑیو جا سکے۔ این ایس جی کمانڈو غی تعیناتی جموں کشمیر پولیس غا دہشت گرد مخالف منصوبہ غو اک حصو ہے۔ جن نانہ کسے وی دہشت گردانہ کا روائی ور فوری استعمال کیو جائے گو۔

LG Sinha

لیفٹنٹ گورنر منوج سنہا نے کہیو ہے کہ بھارت اپنا قدیم روایتی ورثہ غی پاسداری کرتاں واں ترقی یافتہ ممالک غی فہرست مانہ شامل ہون واسطے سال 2047 آلا ہدف آلے پا سے رواں دواں ہے۔ ان نے کہیو کہ اس وقت سائینس تے دوجا شعبہ جات غا ماہرین نانہ آگے آگے ترقی غا اس سفر غی قیادت کرنی چاہیے۔ اس تیں پہلاں موصوف نے سال 2024 واسطے کیلاش سنسکرت رتن ایوارڈ پریم پوجیا نرنجن سوامی کیلاش نند گری جی مہاراج نانہ ویدک سنستھان ٹرسٹ مانہ منعقد اک پروگرام غے دوران دتو۔ اس دوران لیفٹنٹ گورنر نے سرکار غی ان پالیسیاں تے منصوباں غو وی ذکر کیو جس نال بھارتیہ ثقافت غا تحفظ تے پھیلاؤ نانہ یقینی بنایو جا رہیو ہے۔

Army Tourism

بھارتیہ فوج نے سیاحان نانہ سیاجن گلشیر، کرگل تے گلوان وادی غی اونچی چوٹیاں ور جان واسطے اجازت دین غو فیصلو کیو ہے۔ تانجے یہ سیاحان مشکل وادیاں نانہ دیکھیں اور اپنا تجربات سانجہ کر سکیں۔ اس ضمن مانہ فوج غا سی اے ایس نے گذشتہ روز اک

لیکچر غے دوران کہیو کہ جموں کشمیر غے اندر اک نوی سرکار نے گزشتہ مہینے دفتر سنبھالیو ہے اور اس سرکار کول سیاحت شعبہ غی بھرپور ترقی غی صلاحیت موجو دے۔ اور بھارتیہ فوج اس طرز غا کم کاج واسطے تربیت کاراں واسطے خصوصی تربیتی پروگرام منعقد کراوے گی۔ تانجے سیاحاں نانہہ ان جگہاں ور پُجن مانہہ کوئی دشواری پیش نہ آوے۔

NCC

نیشنل کیڈٹ کا ریس این سی سی غا 3 نوجوان کیڈٹس نے آگرہ غے اندر آرمی اٹربون تربیتی اسکول مانہہ پیرا غا بنیا دی کو رس نانہہ کامیابی نال مکمل کیو ہے۔ 1 نومبر تیں 25 نومبر تک چلیا اس پروگرام مانہہ سخت ترین مرحلہ آیا اور خلائی آپریشن ور تربیت دتی گئی لیکن گو رنمنٹ ڈگری کالج کشتواڑ تیں انجنا پر بہار اور جی ڈی سی کٹھوعہ تیں لشکمی دیوی نے یوہ تربیتی کو رس کامیابی نال مکمل کیو۔

CS Hot House

چیف سیکریٹری اٹل ٹلو نے گزشتہ روز باغبانی ترقی اسکیم غے تحت لال منڈی سرینگر مانہہ ”ہاٹ ہاؤس“ گو افتتاح کیو۔ اس دوران اُن نے باغبانی شعبہ غی بکھ بکھ فلاحی اسکیمیں غو جائزو لیو اور متعلقہ افسراں نال وی ان اسکیمیں غے متعلق تبادلہ خیال کیو۔ موصوف نے کہیو کہ مجموعی ذرعی ترقیاتی پروگرام غے تحت چل رہیا 29 پروجیکٹاں وچوں اک پروجیکٹ غے تحت دوائی تیار کرن واسطے پودا تے دیگر جڑی بوٹی تیار کی جائیں۔ اس پروگرام غے دوران موصوف نے متعلقہ افسراں نانہہ ہدایت جاری کی کہ وے محکمہ غی فلاحی اسکیمیں غے متعلق عوام اور بالخصوص نوجواناں نانہہ بیدار کریں تا نچے جڑی بوٹی غا اس کم کاج نال نوجوان جڑیں اور اس شعبہ مانہہ روزگاری حاصل کر سکیں۔ اُن نے مزید کہیو کہ مُلک غے اندر اس طرح غا پیڑ پوداں تے جڑی بوٹیاں غی کافی مانگ ہے۔

Medical Patrol

ضلع ریاسی غے اندر بھارتیہ فوج تے مقامی لوکاں خاطر طبی سہولیات پجان واسطے بلمت کوٹ تے مکھی دھار گرائیاں غو دورو کیو اور ضروری ادویات تے طبی سہولت فراہم کی۔ اس دوران علاقہ غا کئی افراد نے اپنو طبی معائینو وی کرایو اور دوائی وی حاصل کی۔ اس دوران عوام نے اس طبی مدد واسطے بھارتیہ فوج غو شکریو وی ادا کیو۔

Child Marriage

بال وویہہ مکت بھارت“ مہم غے تحت خواتین نانہہ بالاختیار بنان واسطے تشکیل دتی گئی ”تنظیم ایچ ای ڈبلیو نے لڑکیاں غا ہائر سکینڈری اسکول ڈوڈہ تے ڈگری کالج بہدرواہ مانہہ پروگرام منعقد کرایو۔ جس دوران کہٹ عمر مانہہ شادی غا نقصانات ور تبادلہ خیال ہوؤ۔ اس دوران طالب علماں نانہہ وی اس ضمن مانہہ اپنی رائے پیش کرن غو موقعو فراہم کیو گیو اور اُن نے کئی معاملات متعلقہ افراد غے سامنے رکھیا۔

Amity Meeting Poonch

بھارتیہ فوج نے ضلع پونچھ غا سائی لاء، کملی گراں مانہہ مقامی لوکاں نال میٹنگ کی۔ اس میٹنگ غو مقصد عوام تے فوج بشکار رابطان نانہہ مزید مضبوط کرنوتھو۔ اس دوران مقامی لوکاں غا خدشات تے کئی دیگر معاملات ور وی تبادلہ خیال کیو گیو۔

اس غے نال ہی خبراں غو یوہ بلیٹن ختم ہوؤ۔